



Inatsisartunut ilaasortaq Aleqa Hammond, Siumut
UANI

Avanersuarimi tunitsiveqarnermut periarfissanik pitsanngorsaaniissamat pilersaaruteqarnersoq Naalakkersuisunut apeqqummut normu 170-imut akissut.

Ulloq 29. december 2009 Avanersuarimi tunitsiveqarnermut periarfissaqarnersoq pillugu taamaattoqassappallu taakkuningga pitsanngorsaaniissamat pilersaaruteqarnersoq Naalakkersuisunut apeqquteqaatit tigumavarput. Uangalu akisussaaffinnut suliaq akisassanngorlugu ingerlatinneqarsimavoq.

Qaanaami tunitsiveqarnissamat periarfissap aalajangiusimaannarnissaa siunertaralugu, Namminersorlutik Oqartussat 2009-mut 2010-mullu Arctic Green Food A/S-imik (AGF) sullissinissamat isumaqatigiissuteqarsimapput.

Ukiup 2009-ip affaanut kingullermut Kalaallit Nunaanni illoqarfinni nunaqarfinnilu aalajangersimasuni taassumalu ataani Avanersuarimi mattannik qilalukkallu neqaannik kiisalu aalisakkanik uumasunillu piniagassanik tunitsiveqarnissamat Namminersorlutik Oqartussat ulloq 22. juli 2009 AGF-imik sullissinissamat isumaqatigiissuteqarput. 2009-mi AGF-ip sulisuisa pikkorissarnissaannut sullissinissamat isumaqatigiissut ilaqarpoq. Sullissinissamat isumaqatigiissutip aningaasartai katillugit 7.500.000 kr.-iupput, pikkorissarnissanullu aningaasat katillugit 575.000 kr.-iullutik.

AGF-ip sulisuisa *Imminut nakkutilliinermut nipisaallu suaannik suliarinnittarnermut periutsinut nutaanut* pikkorissarnerat Maniitsumi sapaatip akunnerani 48-mi ingerlanneqarpoq. Qaanaamiit tunitsivimmi pisortaq taassumalu ulluinnarni parlatsigisartagaa peqataapput. Piffissami 18/11-miit 2/12-imut Qaanaamiinngillat. AGF-ip nalunaarutigaa, tunitsiviit pisortaasa tamarmik aallartinnatik tunisassiorfiup piffissami aalajangersimasumi matoqqagallarnissaanik tunisisartunut paasissutissiisimallutik. Piniartut, qilalukkanik sassisimasut, taama sassinerup aallartinnginneraniit pisaminnik tunisisinnaangitsut paasitinneqareersimasussaagalarput, tassami tunitsivik ammaqinneqarpat pisaat tunineqarnissamat pisoqalilereersimassammata, taamaasillutillu nersutit nakorsaannut tunngasunut malittarisassat eqqortinneqarsinnaajunnaassallutik.

Qaanaami politiit Namminersorlutik Oqartussat ulloq 22. november attavigisimavaat nalunaarfigalugit sassat 10-15 kilumiiterimik ungasitsigalutik Qaanaap kujataata kangianiilersimasut. Aalisarnermut Piniarnermut Nunalerinermullu Naalakkersuisoqarfik (APNN) ulloq 23. november 2009 sassinissamat akuersipput, Qilalukkanik qaqortanik qernertanillu illersuineq piniarnerlu pillugit Namminersornerullutik Oqartussat nalunaarutaat nr. 2, 12. februar 2004-meersoq § 12 aamma § 13 naapertorlugit akuersissuteqarnermigut. Sassisoqarnerani 39-inik qilalugartoqarsimasoq nalunaarutigineqarpoq, taassumalu saniatigut uumasut sisamat tallimallu akornanni amerlatigisut sikip ataani piffissami tulliusumi nassaarineqarput.

Qaanaami tunitsivimmi piffissaq eqqarsaatigalugu imaluunniit tunisat annertussusaannut tunisinissamat killeqanngilaq, taamaattumik sapaatit akunnerini 47-mi 48-milu qilalukkanik tunisassiassanut tunitsivissaqarsimannginneq pisimasut nalaatsorneratigut pisimavoq.

7. januar 2010
j. nr. 2009-170
Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@gh.gl
www.nanoq.gl

Namminersorlutik Oqartussat qulaani eqqaaneqartut pillugit ilaatigut, Qaanaami tunitsivik pillugu AGF A/S-imik sullissinissamut isumaqatigiissuteqarsimavoq, taamaattumillu 2010-mi tunitsivissaqarnissamut periarfissaqarnissaq isumaqatigiissutit malillugit ingerlaannassaaq.

Inussiarnersumik inuulluaqqusillunga

Ane Hansen

Aalisarnermut Piniarnermut Nunalerinermullu Naalakkersuisoq